

Guangjisi Minzcu Bau

ganhhau: CN45-0036 B.2019 Nd.8 Ng.7 liggaeuq geijhailh nienz ndwencaet cocaet

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3386期

Hong Hoizguh Denyingj Vah Minzcu Vunznoix Guengjsae Cingzcik Yienhda

Vih swncien baujhoh vwnzva minzcu vunznoix, hawj vunzlai minzcu vunznoix Guengjsae ndaej yawj denyingj vah minzcu bonjfaenh, mboengneix, Swcigh Minzcunghvej caeuq Aen Gunghsw Mizhanh Ciz-donz Denyingj Guengjsae ciemdingh le gij hezyi cuengqingj denyingj hoizguh vah minzcu vunznoix Guengjsae, vih hoizguh 《Sam Bienq Bya Bienq》banj Vahcuengh Duh'anh Yauzcuz Swciyen, 《Canlangz 2》banj Vahcuengh Cingsih 2 bouh benqgojgaeq denyingj vah minzcu vunznoix Guengjsae neix gunghawj baujcang.

Daj bi 2009 doxdaeuj, Guengjsae gungh miz 500 lai bouh denyingj

daezcaiz gak loh hoizguh baenz banj vah minzcu vunznoix, cuengqingj daj hainduj binaengz geij cien ciengzbaez daengz seizeix 2 fanh lai ciengzbaez, bouxyawj minzcu vunznoix daengz 300 lai fanh vunzbaez. Aen danhvei hoizguh denyingj vah minzcu vunznoix Guengjsae seizeix miz aen cungsim hoizguh aen ndeu caeuq 8 aen danhvei boiqyaem. Ciuq swliu rox, gij caetliengh hoizguh denyingj vah minzcu vunznoix Guengjsae baiz youq baihnaj daengx guek 11 aen aen cungsim hoizguh denyingj vah minzcu vunznoix, gonqlaeng miz benqgojgaeq 《Baksaek Gijyi》《Ciu Yiluz》《Dagezcan》daengj, benqgohgyau 《Faexbaudungz》《Yungh Nywj Ndaem

Raet》daengj 20 lai bouh denyingj ndaej benq hoizguh denyingj vah minzcu vunznoix daengx guek ciengjdwngzlungz, ciengjcinmaj daengj ciengj youqgaenj.

Hong hoizguh denyingj vah minzcu vunznoix Guengjsae vih vunzlai dieg minzcu vunznoix yawj rox yawj ndei denyingj, doeksaed minzcu cwngecwz dangj, fatyengz vwnzva minzcu, fungfouq gij ndwenngoengz vwnzva vunzlai dieg minzcu, coicaenh minzcu doxgiet, ginghci hwngfat, gungganq gij eijsik Cunghvaz minzcu caezcaemh daengj fuengmienh, guh'ok gungyen hung.

(Cang Haijing Lij Lizyungj)

SIUSIK DINJ

● Geij bi neix daeuj, Cungzcoj Si Gyanghcouh Gih Sinhhoz Cin Bujvah Cunh Mbanjubvah ciuq dieg bae guh, doenggvaq gij vunqsik “dangjcihu + aen giyez lingx-daeuz + dieggoek canjnieb + nungzhoh”, riuzcienj diegnamh 1600 lai moux, dajcauh youzlangh, minzsuz daengj vwnzva lijyouz hanghmoeg, caemhcai cunghaen vatcimh gij dinfwngz guh dangznding, guh ceiz daengj, caenh'itbous hawj dieg lijyouz bienq lai, gya'gvangq diuzroen vunzlai baenz miz.

(Dangz Cez)

● Ndwen 8 ngoenz 2, lauxhangz Vanzgyangh Mauz-nanzcu Swciyen Suijgojiz bae daengz Dacaz Yangh Sanhhoz Cunh Mbanjbwzlanz son'gyauq ndaem mak, gungh miz 60 lai boux dangjyenz lajmbanj, ranzungzhoj caeuqfaenh songyauq. Mwh hozdung, lauxhangz son vunzlai dinfwngz ndaem makgam, fuengz bingh nonhailh, dapboiq gij yingzyangj doenghgo daengj, caemhcai dangciengz guhyienh daet nga, doengzseiz ganggej vwndiz hawj vunzlai, son vunzlai hwngfat canjnieb laisou baenz miz.

(Veiz Yencunh)

● Geij bi neix daeuj, Hozciz Si Yizcouh Gih yungh hawciengz guh daujyang cauh gij vunqsik moq siufeiq banggungz, gaenxmaenx dungyenz yinx doenghgi aen giyez minzyingz yungh canjnieb banggungz guh cawjung fuengyiengq, caeuq mbanj gungzhoj, ranzungzhoj gapdoi, giengzvaq aen gihci hwnjguh aen cenhenh banggungz caeuq doxgap banggungz, cauh'ok gij heiqaenh ndawbiengz siufeiq banggungz naekna.

(Cinz Fanghsw)

● Ndwen 7 ngoenz 30, aen doih yienjheiq Laizbinh Si Hinghbinh Gih bae dieg capyouq Vujgingj Laizbinh Si Cihdui Gihdung Cunghdui guh hozdung camnai yienjok. Aeu gij cezmuz lai cungj lai yiengh soengq bae daengz gingjyengz, caemhcai caeuq guen bing caemh daiz yienjheiq, caez gangj gij cingz bouxbing caeuq lwgminz.

(Hoz Yencuj)

Lungzswng: Angqyangz Yiengjsouh Aen Hozdung Minzsuz Seizndat



Ndwen 8 ngoenz 2, Lungzswng Gak Cuz Swciyen Lozgyangh Yangh Liengzbingz Cunh Mbanjvuhz Mbanjmyauz gwn ciet haexmoq, ngoenz haenx guh doengh gij hozdung guh ceiz, muh mbaceiz, guh caz daengj, langhbaiz gij vwnzva ciuhgeq Myauzcuz lai cungj lai yiengh dangdieg hawj bouxhek gak dieg yawj. Ndaw doz dwg vunzlai cingq muh mbaceiz.

(Veiz Gizyangz Vuz Cencen/韦吉阳 吴倩茜)

Dasinh Yen Banh Gaiq Daeuz Ciet Vwnzva Dajndaem Bouxcuengh

Vih senhconz langhbaiz gij vwnzva deihsueng Dasinh Yen miz daegsaek, caenh'itbous vatcimh gij vwnzva neihanz vwnzva dajndaem, hawj minzcu vwnzva canjnieb ndaej daezswng, ndwen 8 ngoenz 1, Aen Gingjih Doenghnaz Mingzsw Dasinh Yen banh gaiq daeuz ciet vwnzva dajndaem Bouxcuengh.

Baez ciet neix neiyungz lai yiengh, miz goengdauh Mbanjcuengh caeqbaiz reihnaz, gouzmbaen fwn yinz rumz swnh, haexgwn fungsou; “fwenvuengz doenghnaz” yungh Fwencuengh angq-coux bouxhek gak dieg daeujdaengz; diuqfoux angqyangz yinx ndaej raq dem

raq angq hemq……baenzdauq cezmuz miz daegsaek doxlwnz yienj, hawj bouxhek yawj baez hei ndei yawj ndeu. Hozdung lij doenggvaq caennang bae ndaem gyaj, youq gyang naz bengcag, gaemh bya ciengj gaeq, guh haexnaengj haj saek daengj baenzdauq hanghmoeg miz gij minzsuz dajndaem caeuq yenzsu daihneix dox giethab, hawj gyoengq bouxhek caeuqfaenh hauejbae, roxnyinh gij ndei vwnzva dajndaem Bouxcuengh.

Gaenh geij bi neix daeuj, Cungzcoj Si hozdung vwnzva ngoenzciet lai dangqmaz, daegbied dwg ciet roengzdoengh Dasinh, Lungzcouh, Denh-

dwngj, Gyanghcouh daengj dieg ceiz nauhyied. Lumjbaenz Dasinh dwg dieg swncien youqgaenj vwnzva roengzdoengh, mboujduen vatcimh gij vwnzva gizdieg caeuq swhyenz vwnzva minzcu lai cungj lai yiengh, haenqrengz vatcimh, baujhoh, swncien caeuq fatyengz vwnzva roengzdoengh, yawjnaek vatcimh baujhoh buhvaq ciuhgeq minzcu, fwen ndawbiengz, gij sibgvenq ndawbiengz, lizsij vwnzva daengj minzcu minzsuz vwnzva swhyenz miz daegsaek, haenqrengz cauh gij binjbaiz vwnzva minzcu bonjfaenh, aeundaeng cingzcik yienhda.

(Lungz Yenyinh/隆艳英)